

Ambasada SAD podržala Zimski debatni kamp o pomirenju

jan 17, 2017



FOTO GALERIJA

U periodu 10.01. – 14.01.2017. godine u hotelu Bistrica na Jahorini je održan Zimski debatni kamp, koji je organizirao Centar za kulturu dijaloga. Ovu aktivnost je podržala Ambasada Sjedinjenih Američkih Država u BiH, a učestvovali su srednjoškolci i srednjoškolski profesori iz cijele BiH (Federacija BiH, Republika Srpska i Brčko Distrikt).

Sljedeći gradovi su imali svoje predstavnike: Banja Luka, Brčko, Čelić, Donji Vakuf, Gradačac, Kladanj, Mostar, Novi Grad, Prijedor, Sarajevo, Srbac, Srebrenik, Tešanj, Tuzla, Travnik, Visoko.

Cilj Kampa je bio educirati mlade kroz argumentiranu raspravu, obrazovnu debatu i kritičko mišljenje da je trajni mir moguć samo onda kada postoji poštivanje za druge i drugačije i ojačati mlade da dignu svoj glas i zagovaraju za promjene u društvu, postajući aktivno involvirani u neophodne obrazovne reforme i promjene u lokalnim zajednicama kroz saradnju sa svim relevantnim akterima.

Srednjoškolci i srednjoškolski profesori iz cijele BiH su razgovarali o najaktualnijim temama o kojima se u bh. društvu rijetko ili vrlo malo razgovara: ljudska prava, pomirenje, trajni mir u

BiH, suradnja između bliskih lokalnih zajednica koje se nalaze u različitim entitetima, održivi mir, uloga mladih u kreiranju interetničkog pomirenja, unapređenje obrazovnog sistema sa ciljem poboljšanja pomirenja...

Tokom aktivnosti, održane su različite edukativne i kreativne radionice u kojima su imali priliku otvoreno razgovarati o najrazličitijim temama i problemima. Srednjoškolci su posebno istakli važnost međusobnog uvažavanja, suradnje i prihvaćanja drugih i drugačijih. Razlike trebaju biti osnova za suradnju, a ne osnova za nove sukobe!. Osnovni moto Kampa je „Svi različiti, svi jednaki!“. Sa ovim motom se nastojalo ukazati na važnost međusobnog uvažavanja i suradnje kao i na neophodnost poštivanja ljudskih prava svih građana Bosne i Hercegovine.